

31

DE  
UNGUE OCULI  
SEU  
PURE INTER CORNEÆ  
LAMELLAS  
COLLECTO.

---

PERMITTENTE  
GRATIOSA FACULTATE MEDICA  
*P R Æ S I D E*  
BURC. DAVID MAUCHART,  
Med. & Chir. D. Confil. & Arch. Wirtemb. Med.  
Anat. & Chir. Profess. Ordin.

Disputabit  
*P R O L I C E N T I A*  
Summos in Medicina honores & privilegia  
Doctōris rite capeſſendi,  
RESPONDENS  
CAROLUS FERDINANDUS BILGER,  
Eſſlingenſis,  
*Ad Diem Jul. MDCCXLII.*

---

*T U B I N G Æ,*  
Typis GEORG. FRID. PFELICKII & JOH. DAV. BAUHOFII.

Digitized by the Internet Archive  
in 2019 with funding from  
Wellcome Library

<https://archive.org/details/b30780974>





## PRÆFATIO.



*Uperrime conscriptas dissertationes , alteram de hypopyo , alteram de empyesi ophthalmiatricas nunc presso pede sequitur præsens de Ungue oculi. Connexæ revera sunt materiæ , sed ita per varios aucthores implicitæ & confusæ , ut , qui non ipsos adiverit fontes harum appellationum , in bivio , quin trivio hæreat ambiguus , quem sequi ducem velit debeatve ? Non vero de nominibus saltem agitur impertiendis in doctrina de morbis oculorum , sed de vetustissimis illis medicorum notionibus secundis jam olim stabilitis , atque sic deinceps de tota cujuslibet affectus theoria ac praxi. Nostra enim sententia , quin communi procul dubio omnium saniorum , denominationes morborum , à vetustissimis atque celeberr. introductæ medicis , ac civitate medica donatæ , retineri debent omnes , nec innovari aut mutari , nisi evidens & summa jubeat necessitas , aut recentioris affectus novi dubii ve natales id exigant absolute.*

*Id vero male habet plerosque quod in ophthalmiatria maxime videantur entia præter necessitatem multiplicari , totque*



*distincti affectus oculorum venditari, qui tamen in multo minorem contrahi possent numerum. Respondebimus alio loco ad speciosam omnino hanc objectionem ex professo, & ingenue docebimus, ubi vela contrahere liceat, ubi non? Hac vice per trigam dissertatiuncularum, supra memoratam, ipsa re demonstravimus, nō fallimur, distinctos omnino affectus esse, hypopyum, empyosin & unguem oculi.*

*Dictatoriam ne per somnium quidem affectamus auctoritatem, neminemque jubemus in nostra jurare verba; speramus tamen fore, ut, qui à præjudiciis liberi, nec philautia sunt occæcati, vel manus dare victas canæ auctoritati, cujus in hac re omnino pondus est maximum, atque luculentis sufficientibusque rationibus, vel meliora docere haud sint dedignaturi; Nos enim ipsi veriore, à quocunque prolata, semper ambabus amplectemur sententiam, atque sic etiam à B. L. veniam decenter efflagitamus, si ipsa hæc de ungue oculi tractatio non satis demorsos sapere videatur ungues. Supplices vero EUM, QUI omnium perfectionum fons est & distributor, imploramus ardentissime, velit conatibus nostris ex alto clementer benedicere!*

§. I.

**U**nguīs κατ' ἐξοχὴν dictus quam denotet naturalem corporis partem in vulgus innotuit. Quàm varias vero significationes & homonymias subeat græcorum ὄνυξ, latinorum unguis, ob brevitatis studium transmittimus. (a) Inter has præsentis disputationis objectum est, morbus oculi, per metaphoram ὄνυξ, unguis dictus. Quam

---

(a) Vid. ὄνυχος, unguis, homonymiæ in Scapul. Lex. græc. & Foësi Oeconom. Hippocrat. voce ὄνυξ. It. Bronon. Lexic. Med. voce unguis.



Quam varia autem sit hujus etiam acceptio atque dolenda *confusio* mox cum *hypopyo*, mox cum *pterygio*, jam nuperrime ingemui-  
mus. (b) Scilicet quod celeberr. *Heisterus* annotat: (c) mirifice  
in designandis oculorum morbis ac nominibus vel recentiores  
etiam Medicos adhuc dissentire: tam verum est, quam quod veris-  
simum. Igitur ab ovo rem ordiemur, &, quàm possunt haberi,  
antiquissimas aliquot notiones unguis oculi præmittemus, ut con-  
stet, quo sensu veteres acceperint illum.

§. 2.

Ex *Hippocrate* non habemus, quod huc trahamus: Non enim  
nisi vel communissima unguis, ceu partis in corpore humano na-  
turalis, vel pro unco ferreo, ad foetum mortuum extrahendum,  
acceptio in illius scriptis & nobis evolventibus, & diligentissimo  
Foësius notata est. Author vero medicarum finitionum, quem  
aliqui *Galenum* prætexunt, ita, sed obscure satis, describit un-  
guem: (d) Suppuratio f. unguis (πύωσις ἢ ὄνυξ) est collectio  
puris in nigro, (e) cum inflammatione secundum iridem ungui  
conformis. In isagoge (f) afferuntur tanquam distincti affectus,  
pterygium, hypopyum, unguis & diapyesis, in medio autem  
versionis latinæ, quam Joh. Andernacus adornavit, atque revidit  
Barthol. Sylvanius, pessime τὸ πτερύγιον, in græco textu obvium,  
per unguem est versum. *Paulus Ægineta* (g) clare ac distincte  
A 3 pro-

(b) Disp. de hypopyo p. 4. in fine.

(c) Laur. Heisteri Chir. Lat. Cap. 60. de hypop. p. 628.

(d) Finit. med. p. 48. edit. latin.

(e) καὶ μέλαν vertit Barthol. Sylvanius Saloñens. it. Foësius in ni-  
gro, & τὸ πρὸς τῇ ἰρίδι, secundum iridem. Quamvis autem  
fortasse rectius *illud* reddatur: circa nigrum: *hoc* circa vel pro-  
pe iridem; tamen neque hæc emendatio nodum solvit, ut  
alibi jam monuimus.

(f) Sive sit Galeni, f. Herodoti foetus hæc isagoge, cap. 15. de  
oculor, affect.

pronunciat, unguem vocari, cum membrana cornea purulenta efficitur, nunc altius, nunc in superficie, ita ut pus habeat unguis figuram: quæ causa sit, quod hoc etiam malum unguis oculi nominetur.

*Aureliano* (h) dicitur ὄνυξ, unguis: in oculi circulo nata macula albida, quæ in unguis similitudinem, nascentis vel crescentis lunæ cornibus respondens paulatim sumit augmentum.

*Actuarius* (i) totidem verbis repetit Pauli definitionem unguis, quod & alii plurimi sequentium seculorum medici græci, Arabes & Latini fecere, quos omnes allegare superfluum videtur.

*Aëtius* (k) paulo accuratius unguem definire censetur abs Gorræo in definit. medicis, quando Ille sic habet: ὀνύχια sive ὄνυχας dici, cum ab ulcere profundiore pus defluere & inter tunicas illapsum ac in circulo iridis figuratum, unguis resecti imaginem refert; Hypopyum vero idem author dicit multo abundare pure & dimidium nigri occupare aut per totam tunicam corneam pellucere. Ideoque πυώσεως duas constituit quasi species, ὄνυχα & ὑπόπυον, sic tamen, ut differentiam in sola unguis similitudine ponat, quæ ἐν τῷ ὄνυχι perspicua, ἐν τῷ ὑποπύῳ nulla sit.

An vero puris vel quantitas, vel figura merito duas affectus species constituere ac diversas denominationes efficere debeat, è principiis tam logicis quam medicis merito dubitatur? Unde nos potius assurgimus doctissimo illi ophthalmiatro Guillemæo (l) qui  
pyosin

(g) Pauli Æginetæ Enchirid. L. 3. C. 22. quæ ibid. allegatur ὑπόπυος ὁ κεφαλαιώδης, recte vertitur cornea purulenta à Stephano in vocab. med. exposit. It. à Foësius in œcom. Hippoc. tit. ὄνυξ: Male vero ab Alban. Torino &c. vid. not. m. Disp. Præsidis de Hypop. p. 5.

(h) Coel. Aurelianus Acutor. L. 2. C. 32.

(i) Actuarius, Zachariæ filius, de method. medend. C. 9. de oculor. vitiis.

(k) Aëtius Terrabibl. L. 7.

(l) Joh. Guillemeau in Traët. de morb. oculor. Cap. de hypopyo, quod quidem ultima syllaba male scribit per simplex i.



pyosin pro genere constituit, unguem vero & hypopyon pro speciebus, sic ut *Unguis* vocari debeat atque *definiri*: Quod sit *affectus oculi p. n. lis* consistens in *collectione ac stasi materiae purulentæ inter lamellas tunice corneæ, vel exteriores magis, vel interiores, mox ad circulum corneæ inferiorem, mox superius, mox versus medium, cum ophthalmia & visus obnubilatione variisque aliis symptomatibus junctæ.*

Quale *pus* stagnans *emulatur figura & colore modo unguium* in digitis *resegmina, απορροχίσματα*: modo *lunulam* illam albidam, in radice unguis humani in digitis obviam, aut aliâs etiam *lunam cornutam*, maxime quando *pus* exigua quantitate ad circulum inferiorem corneæ residet, inter corneæ tamen lamellas adhuc conclusum.

### §. 3.

Hærens inter ultimas corneæ lamellas interiores hocce *pus*, atque circulo corneæ interno (quem Aëtius, suprâ §. 2., circulum iridis vocat) proximum existens imponit facile incautis, acsi in ipsa oculi camera anteriore jam esset effusum, unde forsitan quoque *ratio* pendet *confusionis* inter unguem & hypopyum, à nonnullis veteribus commissæ. Interim quamdiu *pus* inter corneæ substantiam lamellasque conclusum manet, *unguem* effici, quamprimum vero corneam intrò perforat & in primam oculi regionem destillat ac colligitur, *hypopyum* generari, & si idem in cornea delitescens *pus* illius lamellas perfodiat vel externas saltem, vel omnes quasunque transversim, sic ut cornea orificio hiet angustiore, per quod in priore casu *pus* effundatur, in altero ipse etiam humor aqueus eructetur, *fistulam corneæ* constitui, distincte & rectius statuendum videtur.

Craffissimus *error* est meritissimorum cæteroquin authorum, quod græcum *Galen*i textum latine reddentes, tot in locis, ubi Ille vocabulum, *πλεγύγιον*, posuit, hi *verterint* per vocabulum *unguis*. (m)  
Idem

(m) Edit. octav. Oper. Galeni, latine redditor. Venet. in fol. An. 1609. Exempla malæ versionis præbent hæc loca: de simpl. med. facult. L. 8. Titul. Tichymal. It. L. 11. tit. Sepia. It. de different. morb. c. 13. circa med. & finem. It. de Tumor. c. 16.

Idem error cecidit etiam in *Celsum* (n) dum unguem putavit esse, quod græci pterygium vocant, scil. membranulam nervosam, ab angulo ortam, quæ nonnunquam ad pupillam quoque perveniat, eique officiat &c. nisi quidem, ex Woolhusii mente, error hic rejiciendus sit in Celsi amanuenses & descriptores, qui loco ungulæ, quæ omnino species est pterygii, posuerint unguem. Rectius enim & nomini non modo, sed ipsi etiam rei convenientius appellasset Celsus τὸ πτερυγίον, latine *alulam*. Itaque inepta illorum versio atque Celsi hic qualiscunque error ac authoritas effecerunt procul dubio, ut quamplurimi è recentioribus, imo recentissimis, alioquin præstantissimis atque celeberrimis auctoribus in hæc devia pariter sint lapsi, quos vero neutiquam heic redarguere, sed tædioso saltem labore, in has vocum origines inquirendi, levare, cetera vero scapham appellare scapham volumus.

#### §. 4.

*Unguis* ergo facile distinguitur ab *hypopyo*, quod in hoc pus sit sub cornea, inter hanc & iridem effusum, collectum atque stagnans in fundo regionis primæ oculi, in ungue vero hæreat adhuc in ipsa cornea, plus minus profunde inter hujus tunicæ lamellas, modò inferius, modo in medio, modo superius. A *pterygio* discrimina- tur evidentissime per hujus definitionem galenicam: (o) quod nempe πτερυγία sint germina adnatæ oculis extrinsecus membranæ, quæ ab ipso perioestio delata ad coronam perveniat. (p) Ab *empyesi* l. *diapyesi* quod in hac pus hæreat in secunda oculi regione, s. ca- mera, post uveam, cornea vero à pure libera sit. (q) A *pyosi* di- viditur

---

(n) Corn. Celsus de re med. L. 7. C. 7.

(o) Galenus de Tumor. p. n. Cap. ult. It. Isagog. de oculor. affect. C. 15.

(p) Pterygium vocarunt olim quoque unguis alicujus in digito pe- dis manusve carnis incrementum, partem unguis operiens, in pedibus ex offensione, in manibus è neglecta reduvia & post inflammationem in pus mutata. P. Æginet. L. 6. C. 85. It. L. 3. C. 81.

(q) De empyesi oculi, ex professo illustrata, vid. Disp. Præsidis.



viditur ut species à genere ; Pyosis enim est suppuration, conversio in pus, quælibet, in genere. Hinc Author vetustissimus finitionum medicarum (§. 2.) male, aut inconsiderate, pyosin pro synonymo & æquipollente ὀνυχῶς, unguis, habuit.

Verùm *aliæ* adhuc sunt *pyosis species*, s. suppurationis in ipsa tunica cornea, quæ unguem propius referunt: Nimirum tot si non omnino species, tamen varietates ulcerum, macularum atque cicatricum. Cum vero singulorum vel sola enumeratio nimium nobis heic eriperet spatium, itaque brevem duntaxat *cynosuram* supeditamus, unde diversa hæc corneæ mala facile *dignoscantur*: Ulcera, maculæ, cicatrices corneæ, superficiem hujus externam tantum non semper occupant, cum pus in ungue hæreat sub extima, imo aliquot exterioribus corneæ lamellis: Maculæ etiam & cicatrices, qua tales, sine doloribus, ophthalmia visusque molesta sensatione ac chronicæ sint, diuque, quin jugiter permaneant, & pelluciditatem in superficie amiserint, unguis vero molestum dolorem, visus nimiam sensibilitatem & turbationem inferat, & vel brevi dissipetur, l. pus effundat in cameram oculi, aut forâs, efficiendo tum ulcus aut fistulam corneæ, l. & denique, siccato pure & condensatis corneæ stratis, maculam relinquat: Excoriationes ulcerosæ, atque varia ulcera, superficiem corneæ convexam obsidentia manifeste sistant insipientibus solutionem continui ac erosionem plus minus profundam, quæ plane non obveniunt in ungue. Itaque differunt hæc ulcera ab ungue, ut ulcus ab apostemate s. abscessu: ibi pus in aprico est, & è faucia exstillans cornea: heic conclusum inter corneæ lamellas.

Paulo difficilior est diagnosi, si tale *ulcusculum* resideat in *concava corneæ superficie*, uti talia aliquando occurrere suo loco ostendemus. Unde attendendum est in tali casu ad profunditatem ulcerationis, ad nitorem & pelluciditatem lamellarum corneæ anteriorum s. exteriorum, intimarum vero nubeculosam alboflavescentem iniquationem, cui aliquando jungitur totius aquei humoris in camera anteriore turbiditas.



### §. 5.

*Pauca ex his præmissis supersunt phenomena unguis constitutiva atque concomitantia* : scil. corneæ superficies convexa lævis quidem & polita perstat sine erosione aut ulceratione, ordinario etiam sine notabili elevatione aut protuberantia p.n.li, sed ex ipsius tamen substantia manifeste transparet albida, vel è flavo albescens purulenta materia, stabilis, certo loco defixa, nunc inferius versus circum & connexionem corneæ cum sclerotica, id quod frequentius obvenit, vel circa medium aut superiorem quendam corneæ locum, variæ magnitudinis & figuræ, quibus mox lunulam, mox resesmina digitorum æmulatur. Si altiore loco hæreat pus in cornea, & quantitate augeatur, descendere solet pedetentim inter lamellas corneæ in locum decliviorum. Coniunguntur inflammatoria atque ardens plus minus rubedo conjunctivæ, luminis molesta sensatio, visus ordinario quædam obnubilatio & obfuscatio, præsertim si pus in cornea hæreat è directo pupillæ : in aliquibus dolor capitis, inpr. hemicrania lateris affecti; illachrymatio, pruritus.

### §. 6.

*Phænomena consequentia* : Pus inter corneæ lamellas si exigua sit quantitatis & benignæ qualitatis dissipatur aliquando sponte naturæ, aut per supervenientem ophthalmiam, quæ plurimum materiæ pituitosæ & glutinosæ è glandulis palpebrarum sebaceis fundit, derivatur, aut per medicamenta in - & - externa resolvitur; Si vero copia abundet, aut acrimonia peccet, erodit lamellas vel anteriores l. posteriores, atque si foras eructetur, efficit ulcus, si intro, hypopyum : Si totam corneæ substantiam perfodiat, fistulam corneæ parit, è qua non saltem pus atque humoris aquei portio statim effluent, sed & posthac quotidie humor aqueus ceu per siphonem elidetur; Imo vero si perforatio amplior sit, metus adhuc gravior imminet prolapsus uveæ, & quæ hinc consequuntur, molestissimorum ac periculosorum symptomatum aliorum. Si condensetur ac tandem exsiccet stagnans hæc materia viscoso-purulenta cudet vel albuginem s. levcoma, vel aliam densiorem & indelebilem relinquet corneæ condensationem albidamque obfuscationem,



tionem, quemadmodum & in adultis & senibus post operationem unguis, dextre licet peractam, ordinario relinquitur eo loci macula & cicatrix alba, quantumcunque illa lævis fuerit & æqualis.

Unde quo amplior, diffusior, profundior & pupillæ magis obversus unguis, eo difficilior est curatio, eoque major fœdæ, visumque impediens posthac maculæ & cicatricis metus. E contrario quo subjectum est junioris ætatis, minoris cacochymix, quo unguis est benignior, à centro s. medio corneæ remotior, quo superficialis magis, quo citius rectiusque subicitur operationi chirurgicæ, si medicamentis cedere nolit, quo post ejus compunctionem chirurgicam externæ corneæ lamellæ brevi evadunt flaccidiores & rugosiores, eo major pleniorque spes affulget curationis, quæ per modum fit sic dictæ exfoliationis.

### §. 7.

*Pathologia.* Unguis est *morbis conformationis* in meatibus, canaliculis atque poris corneæ dilatatis & infarctis à materia stagnante purulenta. Aut considerari potest etiam qua *symptoma qualitatis* mutata, scil. pelluciditatis, qua cornea gaudet naturaliter, abolita, & inducti p.n. coloris flavo-albescentis, cui ergo symptomati morbus, tanquam causa proxima, subest is ipse conformationis, in limine hujus paragraphi allegatus. *Subjectum morbi*, quod *est* cause heic ordinario simul esse solet, est tunica cornea, κατ' ἐξοχήν dicta, sive portio scleroticæ anterior diaphana. (r) Constat hæc e pluribus

B 2

pluribus

---

(r) A celeberr. Winslovio, aliisque cornea oculi tunica dividitur in opacam, s. scleroticam & in diaphanam, quæ cornea κατ' ἐξοχήν audit aliis, hancque continuationem videri scleroticæ asserit oculatiss. ille Anatomicus, in Expos. anat. in 4. Paris. 1732. p. 662. §. 214. Sed nobis distincta videtur & diversa valde esse cornea à sclerotica per structuram manifestius atque copiosius porosam & lamellatam, transparentiam, turgiditatem succulentam, intumescantiam & incrassationem notabilem, dum in aqua maceratur, per vasorum mere lymphaticorum, nullam san-



pluribus lamellis , s. stratis sibi invicem appositis , ( s ) sed intime connexis , ita ut nullum inter se vacuum aut interstitium relinquant. Extima harum lamellarum , tenuissima , videtur esse progenies & continuatio conjunctivæ , super totam corneæ superficiem convexam subtilissime expansæ. ( t ) In statu naturali , sano , nulla unquam vasa , sanguinem rubrum vehementia exhibet , in p. n. li vero vasa hæc , ob impulsum sanguinis arteriosi fortiolem , dilatantur atque crassiolem sanguinis portionem , purpuram , admittunt , id quod maxime apparet in morbo , *corneæ venositas* , dicto , item in ophthalmiis externis. Instruitur cornea plurimis poris , ( u ) qui diaphanum laticem in sanis , glutinosum in moribundis atque de-

mor-

---

sanguinis portiolem rubram vehementium in statu scil. sano , & denique per distinctum , singularem obliquum utriusque tunicæ concursum & implantationem.

- ( s ) Mediante cultro anatomico possunt dividi in numero plures , 6. 8. 12. In cadaveribus aliquandiu asservatis haud raro sponte una alteraque exteriorum harum lamellarum secedit. Post operationem unguis , & in aliis corneæ morbis , pariter illæ videntur manifeste separari & quasi exfoliari. Veteribus non fuerunt ignotæ , sub nomine corticum corneæ , ut passim è Galeno patet.
- ( t ) Demonstravit id plus semel in anatomiis publicis Præses. Consentit Winslov. in Expos. anat. p. 674. §. 274. Confirmant varii & plurimi oculor. morbi , quos , brevitatis studiosi , prætermittimus.
- ( u ) De his vid. Nic. Steno in Tract. de musc. & gland. Jac. Hovius Tract. de circulari humor. motu in oculis p. 90. Jac. Benig. Winslow dans les memoires des scavans , Anni 1721. edit. Amstel. p. 417. it. Ejusd. exposit. anat. p. 662. §. 216. Poros vero hos corneæ rectilineos supponi debere videtur , tam ex ejus diaphaneitate , si in naturali maneant situ , quam ex opacatione corneæ & contractis albidis maculis post vulnuscula atque ulcera ejus consolidata ut plurimum relictis , per condensationem scil. & obstructionem horum pororum.



mortuis plorant, quique in horum oculis manifeste aliquando, & subinde per modum telæ, superficiem corneæ investit, post mortem vero è cornea, digitis compressa, clare satisque copiose per superficiem corneæ externam exstillat. Unde hic veniat humor, non æque planum est? An à Nuckii ductibus aquosis? quibus Ille quidem humoris aquei secretionem modò tribuit. An à vasculis excretoriis glandulæ innominatæ, (lachrymalis np.) nunc duobus, nunc tribus, in bobus maxime observatis ab Hovio, humore claro pellucido repletis, ex parte inferiore illius glandulæ oriundis atque circa corneæ circulum ipsam subintranibus corneam, prout *Hovius* describit & delineat. (w)

An vero, quod probabile, à ramificationibus arteriæ carotidis externæ orbitalibus, à ramo carotidis maxillari interno dicto proficiscentibus, & per anastomosin junctis circa medium bulbi cum ramis internæ carotidis, utpote quæ ramificationes non tantum superficie corneæ, sed & toti ejus substantiæ inferuntur? Aut denique num hic corneæ humor partim debeatur transpiranti per corneæ poros humoris aqueo, in prima oculi regione obvio? quæ Nuckii est sententia: (x) acriter vero & plausibilibus impugnatur argumentis abs Hovio. (y)

Ita pariter sub judice lis est, num humor ille diaphanus corneæ, ad hujus nutritionem & humectationem destinatus, per corneæ poros, quos Hovius l. c. nihil aliud esse, quam orificia ductuum suorum excretoriorum, è glandula lacrymali oriundorum, reputat, partim excernatur in superficiem corneæ convexam, pro ejus perpetua humectatione, partim per venas ad cor revehatur? Sicuti Hovius statuit l. c. Num vero absorbeatur fortassis atque revehatur in communem humorum & sanguinis massam, per illa corneæ plurima vascula nova, secundum longitudinem decurren-

B 3

tia,

(w) Jac. Hovius Tract. de circular. humor. motu in oculo. 2. Lugd. Bat.

(x) Ant. Nuck. Sialograph. & ductuum aquosor. anatome nova. 8. Lugd. Bat. 1690. p. 111.

(y) Hov. de circular. humor. mot. in ocul. p. 26. sqq.



tia, quæ neque sanguiflua, neque lymphatica sint, quantumvis lymphaticorum æmula, & per quæ, juxta mentem & descriptionem Ruyfchii, (2) reducatur humor aqueus, advectus per ductum Nuckii, vel alium ignotum? problema est.

§. 8.

Prolixior hæc corneæ, tanquam subjecti affectus nostri, descriptio anatomico-physiologica, in quantum scilicet morbum hunc ocularium respicit, præmissa multis phænomenis in ætiologia, prognosi ac therapia lucem accendit, sponte sua radiantem. *Causa proxima* unguis est stagnatio stasisque inflammatoria sanguinis, lymphæque è vasculis tenuissimis corneæ p. n. dilatatis effusi inter corneæ lamellas atque in suppurationem abeuntis. *Causæ antecedentes* & *procatarcticae* sunt: stimulus, irritatio, ictus, collisio, contusio bulbi anterioris, ophthalmia gravis, chronica, frequens, vesiculæ, phlyctænæ, præcipue vero *pustula variolosa*, corneam obsidens & pus suum inter corneæ lamellas effundens. Accidit aliquando sponte, à causa interna, talis pustula variolosa corneæ, uti passim in tota reliqua corporis peripheria, sive apertæ maneant ferventurque variolosorum palpebræ, sive clausæ. Intempestiva vero muliercularum sedulitas atque panicus terror sæpe nostro unguis affectui tum viam sternunt. Uti enim in quamplurimis variolosis palpebræ salutari quodam cæmento & glutine per aliquot dies coalescunt, atque sic non modo contra molestum lumen muniuntur, sed quam maxime etiam contra acrimoniam & contagium puris, vel destillantis è variola palpebræ aut tarfi, vel illiti per manus digitosque impuros variolosi patientis, providissime muniuntur; Ita pessime agunt, qui naturale hoc propugnaculum intempestivè dirimunt aperiuntque, nisi quidem è gravibus perpetuisque oculi doloribus pulsatoriis constet de corneæ quadam inflammatione suppuratoria, per modum unguis, vel hypopyi, atque de actuali corneæ variola.

§. 9.

---

(2) Fred. Ruyfch. Respons. ad Christian. Wedelium de oculor. tunicis p. 14.



§. 9.

*Therapia. Indicationes* sunt : α) Nimum ad oculos affluxum moderari, revellere, derivare. β) Stasin sanguinis atque puris discutere, resolvere, vel, si hoc sperari, aut obtineri nequeat, γ) pus eliminare ac evacuare per operationem chirurgicam. δ) Factum hinc vulnusculum & apertum abscessulum mundificare, consolidare, lævi, ac, quantum licet, diaphana cicatrice claudere. ε) Ultimòque oculum, visumque roborare.

§. 10.

*Primæ indicationi*, scil. nimio ad oculos affluxui moderando, revellendo, derivandoque inserviunt in plethoricis, ventilationibus sanguinis adsuëtis, in suppressionibus mensium, hæmorrhoidalis fluxus nariumque hæmorrhagiæ, aut actuali sanguinis orgasmo, &, quem vocant, raptu ad caput, *venæsectio* brachii aut pedis κατ' ἰξιν, scil. in latere affecto, *cucurbitula scarificata* in humeris dorsoque, *hirudinum applicatio* ad anum. *Pediluvia* tepida, lixiviosa: *Frictiones* pedum asperæ: *Suppedanea* acria: *Vesicatoria* pedum suris, aut brachiis imponenda: Denique præmissa sufficiente tali revulsione, & per venæsectionem evacuatione, ipsa internæ palpebrarum superficiei scarificatio, s. *blepharoxysis*. (aa) *Enemata*, purgantia, alvum stimulantia.

§. 11.

*Secundæ indicationi*, np. stasin sanguinis atque puris discutendi, resolvendi famulantur *epithemata*, *sacculi*, *collyria* è resolventibus parata e. g. hyssopo, serpillio, roremarino, fl: sambuc. lavend. croco, camphora, sem: fœnic. Rad: valer. &c. in vino, aut aq: calc: viv. & vini portionibus anaticis, leviter coctis: *Cataplasma*, è medulla pomi affati, addito croci & camphoræ tantillo, nec non antimonio diaphoretico & pulvere rad. ir. flor. Collyria sicca minus conveniunt; Circa humida etiam caute versari oportet, ne scil. vel acri stimulo affluxum & dolores augeant, vel nimia humi-  
ditate

(aa) De hac blepharoxysi vid. notam inferius lit. ff.



ditare corneam imbuant, vel repellendo, obstruendo, adstringendo lupum stabulis includant. Si quæ ergo velint adhiberi, ex aq: sambuci, lavend. rofar. cum antimon: diaph. & refracta dosi camphoræ atque croci parata oculo tepida frequenter instillari, atque calefactis spleniis oculus muniri poterunt. (bb)

### §. 12.

*Indicationi tertiæ*; pus inter corneæ lamellas stagnans eliciendi ac evacuandi, satisfacit *operatio chirurgica*. De hac igitur distincte agemus. *Instrumenta* huic inserviunt: Primo *acus subtilissima*, brevi ac tenui manubriolo argenteo adaptata, & firmissime conferruminata, lineæ mathematicæ, plus minus, longitudine prominens è manubriolo cuspide sua acutissima. Plura ad manus sunt ejusmodi instrumenta, aliud nempe unica saltem acu præditum, aliud duabus, quin tribus quatuorve acubus, proxime ad se invicem & in serie recta collocatis, aliud longioribus, aliud brevioribus instructum cuspidibus, prout vel superficiali, vel profundiore opus est punctione.

Woolhusius appellat hoc instrumentum gallica lingua, *le monchetoire*: composito nomine græco vocat Præses *κατάνυπτερον*, *catanyptum*, à *κατανύπτειν*, compungere, pungendo penetrare. Actio enim hujus instrumenti consistit in eo, ut acubus illis compungatur & perfodiatur una alteraque lamella corneæ, sub quibus pus delitescit, atque sic materiæ illi paretur exitus. Potest solique huic scopo alia etiam *acus*, cataractis deponendis vulgo dicta, *teres*, *acuta* inservire.

Secundò autem, si pus vel nimis profunde delitescat, vel nimis crassum sit, quod ideo per exilia, acubus illis inflicta, punctula nequeat excerni, requiritur *alia acus*, manubrio obfirmata ligneo, aliove, polygono, *modice incurva*, *plana*, à latitudine in medio

---

(bb) Prolixi nolumus esse circa 1. 2. & 5. hujus affectus indicationes, ne cramben recoquamus, nuper demum in Disp. de hypopyo p. 15. 16. 17. 18. liberaliter appositam. Quoad has enim indicationes par ratio est hypopyi atque unguis.



medio maxima, quæ dimidiam lineam mathematicam æquat, definens pedetentim in apicem acutum, sed tamen planum, angulis f. lateribus duobus acute scindentibus instructa. *Speculum oculi*, (cc) & *suspensorius* palpebræ superioris *hamulus* complanatus, (dd) quibus inter operandum oculi bulbus stabiliri atque palpebra superior attolli sicque oculus plene detegi possint, ad manus quoque funto, ut, si digitis operator suis nequeat has indicationes sufficienter exsequi, illis utatur instrumentis.

*Ministri aliquot*, qui caput, brachia &c. ægri, in operatione forsitan reluctaturi, valide detineant, & res necessarias operatori porrigant, adsunt. In parato etiam haberi debet *decoctum aliquod*, è fl: sambuc. lavend. & semine lini; in aq: communi vel lacte coctis, cujus vapor modice calidus ad oculum affectum statim ab operatione sit admittendus. Item *sacculi* è supra (§. 11.) laudatis resolventibus in vino cocti & expressi: Et denique *potio* quædam *analeptica*, *spiritusque* fragrans pro odoramento, si vires deficere sentiantur.

*Hypocaustum*, in quo suscipitur operatio, satis *luminosum* sit atque *calesactum*, ut operator clare perspiciat locum affectum, & aer frigidiusculus liberque ab oculo arceatur.

### §. 13.

*Æger* in lecto *supinus collocatur*, capite declivi. Caput ejus abs ministro, à vertice ægri constituto, firmissime manibus tenetur, brachia vero ab aliis amanuensibus pariter immobilia figuntur. Ipse operator alterius manus digitis, pollice ac indice diducit palpebras oculi affecti, aut hamulo suspensorio (§. 12.) palpebram superiorem vel elevat ipse, vel attolli curat per adstantem famulum. Si bulbum oculi nimis vagum & desultorium stabilire oporteat,

C

appli-

---

(cc) Quale abs Woolhusio inventum delineari curavit Heisterus in Chir. lat. Tab. 17. fig. 16.

(dd) Suspensorius hicce hamulus describitur in Præsidis Disp. de hypop. p. 26. circa finem, & à celeberr. Heistero per iconem sistitur in Chir. lat. Tab. 16. fig. 1.



applicatur speculum oculi §. 12. sub palpebras, quod totum in peripheria complectens bulbum, satis hunc obfirmabit. Si tamen binis hisce instrumentis supersedere liceat, & æger & operator non uno liberabuntur incommodo.

Antequam ipsa punctiōnis operatio instituatur, undique disspiciendum & visu explorandum est subiectum morbi, qua scil. sui parte protuberet maxime? ubi cornea sit albidissima atque opacissima, atque sic major puris subtus latentis copia? Annon in peripheria, vel alibi, extimæ corneæ lamellæ jamjam à subjacentibus sint divisæ ac elevatae? ut scil. operator talem maxime locum corneæ, eumque decliviozem destinet punctiōni.

Pro latitudine ac profunditate stagnantis inter corneæ lamellas purulentæ materie eligit operator catanyptum §. 12. acu una, l. pluribus instructum, idque mox superficietenus, mox profundius impellit, tam alte vero nunquam, ut intima ultimaque corneæ strata pertendantur: Catanyptum inter indicem ac pollicem firmiter detentum defigit & intrudit operator rectâ & perpendiculariter semel atque simul in locum corneæ affectum, ita ut facto uno alterove foraminulo pus subjacens excludare queat vel sponte, vel porro ad exitum facilius promoveri. Acquiescit primo hoc tentamine chirurgus.

#### §. 14.

Statim ab hac prima compunctiōne ægri caput magis acclive collocatur atque sustinetur, bulbus oculi lavatur foveturque partim admissō vapore tepido, (§. 12.) aut hujus decocti aliquot guttulæ jugiter instillantur, aut labrum ophthalmicum (bassin oculaire vocat Woolhusius) bulbo oculi immediate superpositum, tali decocto repletur, ut hoc corneam alluat. Quæ variæ enchireses sicut ad diluendum pus tendunt, illiusque effluxum facilitandum, ita per aliquot minuta non modo continuari, sed frequenter etiam repeti debent, impositis per intervalla sacculis solventibus calidis, in vino coctis §. 12. vel & cataplasmatibus è medulla pomi sub cineribus assati, cui postea antimon: diaph. atque croci & camphoræ tantillum remisceantur.



Si unica primaque hac punctione, & subjunctis modo laudatis diluentibus atque resolventibus topicis remediis, intra unum alterumve diem nondum satis evacuatum puris videatur, aliis novis locis denuo, ut supra dictum, adhiberi catanyptrum & dehinc repeti in limine hujus paragraphi laudata methodus debent.

### §. 15.

Si vero *pus nimia* laboret spissitudine ac *tenacitate* & per exiles has acupuncturas exire renuat, acu curva, pungente in apice, ac in lateribus scindente, (ee) qualem §. 12. descripsimus, locus corneæ affectæ tumidior, albidior atque declivior pungendus atque latiore vulnuscule aperiendus, postea vero non modo, ut §. superiori dictum, lavandus est atque fovendus, sed & instillato, altera ab hac operatione nocte, collyrio ex Aq: sambuc. hyslop. valerian. ana ꝑvj. pollinis rad: ir: flor. ꝑβ-aloes socotrin. gr. iij. camphoræ gr. j. M. irroranda adque exfoliationem, s. lamellarum exteriorum separationem, leni hoc stimulo atque abstergente collyrio promovenda est cornea. Similem usum præstabunt, pinguedo viperarum, aqua ophthalmica viridis Hartmanni, & ophthalmica Quercetani. Omnia tamen acria atque septica cautiissime, adstrictiva vero, qualia sunt vitriolica & saturnina minimè debent adhiberi: Imo ne quidem unctuosa tunc conveniunt ordinaria.

Inter hæc *interna* quoque *medicamenta* alvum blande & per *ἐπιγαστρικῶν* subducentia, temperantia, absorbentia, diaphoretica possunt debentque propinari, *regimen* & *dieta* sic præcipi, ut massa  

C 2
humo-

---

(ee) Godefr. Bidloo Exercit. anatomico - chirurg. Cap. de oculo purulento p. 93. scalpellum adhibere jubet, qui arcum, vel hominis linguam exprimat, cujusque pars anterior solummodo acuta, latera vero obtusa sint, ut ne scil. ulterius, quàm velis, ruat. Ast metum hunc temperabit suspensa providaque chirurgi manus: latera vero acus scindentia eum in finem sunt necessaria, ut, quum latior est unguis, latius etiam infligi vulnus, quin ipsæ extimæ lamellæ corneæ uno ictu & perforari & discindi valeant: nostram acum v. in Heist. Chir. lat. Tab. 16. fig. 2.



humorum nec obruatur, nec in orgasmum concitetur, aut noxia inficiatur qualitate.

Imo si *ophthalmia gravior* externa vel interna subsequatur, venæsectio pedis vel brachii, vesicatoria in nucha vel pone auriculas, tandem & palpebrarum superficiei internæ scarificatio, s. blepharoxylis, (ff) adhiberi debent.

§. 16.

Paucis ab illa punctione (§. 14. & 15.) diebus corneæ affectæ superficies atque lamellæ exteriores contrahunt quasi rugas atque plicas, bono faustæ exfoliationis omine, quam itaque Woolhusius adjuvare jubet hoc collyrio: ꝛ. Croci metallor. ꝑj. infundendi in aq: foenic. ꝑij. dehinc decantata, s. per inclinationem effusa hæc solutio, guttatim atque semel iterumque quotidie instillanda est loco corneæ affecto, & per minuti, vel paulo longius, spatium palpebris occlusis est relinquenda, alternis etiam diebus pulvis subtilissimus sacchari canthi albi, in mortario plumbeo bene triti, & saturnina virtute aliquantum imbuti, loco affecto inspergendus est, utrobique vero dehinc, diductis iterum palpebris, lavare ac abstergere bulbum oportet in aqua lactis destillata, vel aqua malvæ & euphrasie tepide, mediante labro ophthalmico, (§. 14.) vel alia blanda ratione.

§. 17.

Leni & modica suppuratione quâdam sic *ulcusculum corneæ* magis magisque *mundificabitur* & *lamellæ* ejusdem corruptæ *ad secessum* s. *exfoliationem promovebuntur*, præcipue si circa vesperam aliquot guttulæ vel grana sequentis unguenti instillentur aut illinantur corneæ: ꝛ. Ung. de tut. ꝑij. Camphoræ gr. iß. aloës socotrin. gr. iij. m. f. Ung. impalpab. Sub ipsa vero hujus unguenti applicatione æger supinus, capite admodum declivi jacens, in hoc situ per dimidiam certe horam maneat quietus hiantibus diductisque palpebris, ut unguentum diutius inhæreat loco affecto. Postmodum clausis pal-

(ff) De scarificatione oculor. vid. Hamppii Disp. An. 1721. De ophthalmoxysi Præsidis Disp. An. 1726. De scarificatione oculor. Platneri Disp. An. 1728. in lucem editas.



palpebris imponatur calidum cataplasma è medulla pomi affati, antim: diaph. ℥j. & camphora gr. iij splenio quadruplicato obtectum, hocque fascia debite obfirmetur, aliquot dehinc horis æger aliquandiu pronus faciei incumbat, (gg) brachiis decussatim faciei suppositis, ut latentis sub cornea puris effluxus ulterior promoveatur atque simul respirandi libertas conservetur. Alternis quoque diebus sub palpebras oculi affecti sex l. decem *grana hormini* jubet *Woolhusius* insinuare oculo, eoque dehinc occluso, per bihorium servare. Agunt hæc & tanquam solida corpuscula, quæ aliàs etiam illapsas oculo impuritates & peregrina corpuscula feliciter everrunt, atque sic exiles corruptæ corneæ lacinias & lamellas extergunt abripiuntque: & ceu mucilaginosæ semina, quæ demulcent atque lubricant.

### §. 18.

Abscessu hoc corneæ, s. ungue, mundato & lamella, vel lamellis, corneæ corruptæ per exfoliationem ablatis, *circa ejusdem consolidationem lente festinandum est*; Ut enim non modo deperdita corneæ substantia regeneretur, sed nova etiam eidem inducta strata debitam obtineant pelluciditatem, lento placidoque opus est modo. Extollit in hunc finem *Woolhusius* sequens ung: R. Ung: diapomphol. ℥β. pulv: g: arab. gr. vj. ol: ovor. gt. vij. Balsam: de mecha, s. opobals: veri. nec non Balsami saturni, (hh) ana gr. ij. M. probe. Poterit unguent. hoc tepefactum instillari corneæ, palpebræ desuper claudi, oculus splenio, aut sacculo sicco, è resolventibus & roborantibus concinnato, atque fascia obtegi, idque mane ac vesperi repeti, donec æqualem, lævem atque diaphanam superficiem & quasi cicatricem recuperaverit cornea, sicque cura feliciter sit peracta.

C 3

Licet

(gg) Nisi quidem unguis profunde inhæserit, atque sub hoc faciei prono situ justus subsit metus, ne intimæ corneæ lamellæ nimis protrudantur forâs, per gravitantes à tergo humores oculi.

(hh) Balsami ℥ duas habet formulas *Jungken* in *Lexic. chymico-pharmaceut.* edit. tert. part. 1. p. 63. & 64. præferimus autem priorem, quam recenset, compositionem *D. Maets*.



Licet vero in adultis hominibus ac in profundiore ungue cicatrix non semper debite pellucida obtineatur, sed albescens ac opaca, pejoribus tamen eventibus atque damnis pessimum obdidisse latet.

§. 19.

*Post superatam hanc curam* oculis studiose aliquandiu parcat ægrotus, nec præmaturæ ad lectionem, scriptionem, solis aut splendidioris aspectum luminis eos adstringat, nec vento, fumo, pulveri exponat: Neque etiam venæsectiones atque purgationes, minimum semestres, negligat. Si *cicatrix albida & opaca remanserit*, sed superficialis saltem, deterfusio ejus paulatina suscipi potest per pulveres, aut unguenta leniter detergentia & mitissime septica. Sed dabitur alia occasio de maculis corneæ variis ex professo agendi.

§. 20.

Dn. de Saint-Yves (ii) duo monita habet, huc spectantia. Alterum: quod si, ut subinde fit, vasa sanguinea, super ipsam adscendentia & reptantia corneam, inferantur maculæ cuidam (imò & ungui) eamque nutrant, hæc rescindi debeant, subductâ quadam acu scindente, vel lanceolâ. Alterum: quod periculosa sit atque inanis illa quorundam methodus, qui pelliculam talis maculæ in cornea jubent auferre lanceolâ, vel alio instrumento, quoniam inde factum vulnus, novam, dum consolidatur, cicatricem & opacitatem, priore haud minorem relinquere debeat. Paulo tamen post expressis hæc limitat verbis, quod scil. in eo casu liceat omnino pelliculam de cornea tollere, si ex pustula variolosa se insinuaverit materia purulenta inter lamellas corneæ; huncque unicum esse casum, cui hæc operatio quadret. Sed quid obstat quæso in ungue, ex aliis etiam causis orto, similem instituere chirurgiam?

---

(ii) De Saint-Yves Traité des Malad. des Yeux. p. 228. seq.

T A N T U M!

NOB.



*NOB. ac CLARISS.*

# DN. RESPONDENTI

*PRÆSES.*

**P**Lus semel mihi in memoriam revocavi ferium illud colloquium, quo me ante triginta hos annos medicinæ tironem dignatus est Dn. Avus Tuus paternus, celeberrimus. Ille ac felicissimus archiater. Hippocratica Is gravitate, subactis iudicio longaque experientia præstantissimus Vir artis medicæ difficultatem & tædia, medicorum vero non paucorum infelicitatem tam nativis tunc pinxerat coloribus graphiceque descripserat, ut parum abfuerit, quin ab incepto me retraxerit opere. Privatum tamen hæc ipsa deinde ruminatus, difficultati laborem assiduum, tædiis patientiam, infortuniis constantiam opponi debere, omnesque tandem scopulos, aura afflante divina, superari feliciter posse persuasum habui, sicque fructum illius confabulationis hætenus obtinui amplissimum, quem ille procul dubio intenderat animo, animum expiscaturus meum. Eandem me jam pariter tibiam inflare, eandemque cantilenam plus semel auditoribus meis præcinere solitum esse haud ignoras, sed iis maxime, qui cicadarum instar, ætatis suæ ver ac æstatem cantando atque saltando transigunt, i. e. partim nihil, partim aliud, partim male agendo



do tempus misere fallunt in academiis atque terunt, dehinc vero post Phoebum nubila duramque variæ calamitatis hiemem experiuntur. Utinam nonnulli hoc sibi capiant verbum, & alieno periculo sapere discant!

Hoc vero probrum, vel paterna potius admonitio, cum TE minime tangat, Nobil. ac Clariss. Domine RESPONDENS, sed potius diligentiam, mores, studia, iudiciumque TUUM practicum integro hoc fere lustro, quo Musas coluisti Tubingenses, abunde TU nobis probaveris; Non vanam profecto videris inflare spem, fore, ut celebritatem *Bilgeriani* nominis, quod per plures jam generationes effloruit in medicina, pro dignitate sis olim tuiturus.

Quare ut TU laudabilem jam studiis academicis finem imponis, sic ego tenuibus hisce pagellis nihil superaddo, præter sincera omnigenæ felicitatis vota, ut bene diuque valeas Ipse, aliosque valere facias felicissime! Ita ergo vale, iterumque vale, & me porro ama TUI studiosissimum. Dab. Tubingæ,  
d. Julii, An. 1742.

